

# Předstaja dalje kročele

## Iniciatiwnicy chcedža klětu nalěto serbski předparlament wolić

**Budyšin/Slepo** (SN/JaW). Iniciatiwa za demokratisce legitimowane serbske ludowe zastupnistwo „Serbski sejm“ džěła dale zaměrnje na zwoprowadženju swojeho projekta, tak mjenowany Serbski parlament wutworić. Kaž iniciatiwa informuje, chcedža hižo přichodny tydźeň štwórtk w Slepom na medijowej konferency dalje kročele do směra na wólby „předparlamenta serbskeho luda“ zjawnosći předstajić.

Při tym pak njejedna so hišće wo wólby gremija, kaž hornjołužiski řečnik iniciatiwy dr. Měrcin Wałda na naprašowanje SN rjekny. „Wólbnu namołwu wozjewimy, ručež wěmy, kak budže spěchowanje wólbow rjadowane“, wón rozloži. Spočatk awgusta bě spěchowanske towarstwo za podpěru k wutworjenju přeněho demokratisce legitimowaneho ludoweho zastupnistwa Serbow „Smy z. t.“ Załožbje za serbski lud próstwu wo pod-

pěru wólbow zapodało. „Dotal žanu wotmołwu nimamy. Na jeje zakładze pak rozsudzimy, kak dale postupujemy. Wolić budžemy tak a znak“, připowědži dr. Wałda přewšu měru rozsudženy. Zdobom zwurazni wón přeći, „zo by so Domowina přizamknyła a zo bychmy trěbne financy za wólby dóstali“. Dale wuzběhny wón hišće raz wuznam wutworjenja parlamenta. „Zarjadowanje je wažny měznik. [...] Přeni króc w stawiznach wuzwoli sej naš lud parlament jako suwerene politiske zastupnistwo“, tak dr. Wałda w nowinskej zdžělenke. Na planach, klětu nalěto předparlament wolić, iniciatiwa dale džěła, přiznawa pak, zo móhlo k dlijenjam dochadžeć, dyrbjeli so tola za druhimi finansielnymi móžnosćemi rozhladować.

Předparlament ma być „přeni woleny serbski gremij, kotryž smě w mjenje serbskeho ludu rozsudy tworić“, rozjasnja dr. Wałda. „Tón móže tež nowe stat-

ne zrěčenje wujednać, štož dotal nictó njemóže. Woleni parlamentownicy su potom legitimowani jednać.“ Ze zjawnym wozjewjenjom wólbnje namołwy, štož ma so po planach skupiny najpozdžišo hač do srjedz februara stać, smědža so kandidaća zjawnje namjetować a nastajić. Wolić smědža wšitcy, kiž so jako Serbja wuznawaja, wuchadža z wólbneho wotběha wot namołwy hač k skonstruowanju předparlamenta. Tež tole budu štwórtk za tydźeň zjawnosći nadrobne rozložić.

Předstajić chcedža iniciatiwnicy w Slepom tohorunja sydomdypkowy plan k předwidžanej kulturnej a kubłanskej awtonomiji Serbow w zjawnoprawniskej korporaciji „Zhromadženstwo Serbow K.ö.R.“. Plan pak nochce iniciatiwa do medijoweje konferency zjawnosći spřistupnić, kaž zdžěli dr. Wałda, dokelž hišće na doskónčnej wersiji džěłaja.